

Maiatzaren
Lehena

Maiatzaren Lehena bateraturik ospatu dute Ipar Euskal Herrian

Baionan 600 pertsona inguru manifestatu ziren, eta Maulen ehundik gora

Maiatzaren Lehenak Ipar Euskal Herrian langile-rien eskubideen alde lan egiten duten sindikatuen eta taldeen arteko batasuna ekarri zuen atzo, ohi bezala manifestaldietan jende ugari bildu ez bazen ere. Mauleko ekimenak izan zuen berezitasunik, Zuberoko eskolen batasunaren presentzia nabarmendu baitzen.

Hur Gorostiaga / Baiona

BAIONAKO manifestaldiak bildu zuen jende gehien Ipar Euskal Herrian atzo. Hala ere 600 pertsona inguru izanzen ziren Lan Boltsatika abiatu eta Herriko Etxe pareko plazaraino manifestari ibili zirenak. CFDT, FSU eta UNSAko kideak aitzinetik, Gazte-riak eta Atxik zein ELBK deitutakoak ondotik, eta CGT sindikatu-ko kideak azkenik.

Hitzaldien txandan lan denbora murrizketaren aldeko adierazpenak nagusitu ziren. Albert Larregain CGTko ordezkariak 68ko maiatza oroitzuz, azken urteotan izan diren borrokek goraipatu zituen, langabetuen kolektiboari hitza eman aurretik. Bodriard langabetuen ordezkariak, «langile eta langabetuek eskaera berak» dituztela azpimarratu zuen.

FSU eta UNSAko ordezkariak lan denbora murrizketa izan zuten aipagai, baina bertzeek egin zuten antzera, «garrantzitsuena hemen ageri den batasuna» dela nabarmendu zuten.

CFDTko Jean Baptiste Etxetok, azkenik, Front Nazionalak



Baionan atzo egin zen manifestazioa.

BOB EDME

hauteskundeetan izandako gora-kada gaitzetsi zuen, «langabezia eta miseria elikatzen diren arrazistak» direla zehazteko.

Atxik taldeekok hitza hartu ez bazuten ere, agiri bidez abertzaleek sozial eremuan kolektiboki antolatze deia zabaldu zuten. «Anitz dira norberaren kabuz lanean ari diren abertzaleak borroka sozialetan. Mugimendu abertzaleak eztabaida eta borroka hauetan badu zer erran eta zereginik. Lan denboraren murrizketa, ondasunen banaketa, denentzako errenta baten eskubidea eta beste. Abertzale mugimenduak borroka nazionala eta soziala kokatzen den bere gizarte proiektua eraikitze eta

bideratzeko tresna behar du» aldarrikatu zuten.

Gazte-riak gazte abertzaleen erakundeak ere agiria banatu zuen. Bertan gazteek dituzten lanpostuen %85 prekarioak direla salatu zuten gazteek eta etorkizunean, gazteen indarra, justizia sozialaren alde egin behar dela azpimarkatzen. «Gazteek indar bat ordezkatzeko dugu, bere geroa egiten ahal eta egingen duen indar bat, demokrazia eta justizia sozialan oinarritua izan den demokrazia sortzeko, anaitasun eta elkartasunaren inguruan».

Maulen tokiko arazoak • Maiatzaren Lehenak tokiko koloreak hartu zituen Maulen. Ehunetik gora

jende bildurik, azken urtean Zuberoan izan diren gertakizunek tarte berezia izan zuten. Iaz Alzürüküko eskola itxi nahi izan zutela eta, baserrialdean eskolen atxikitze kolektiboa osatu zen eta Zuberoako Eskolen Batasunak bere presentzia markatu zuen manifestaldia, eta bukaerako hitzaldia. Lanjerrean dauden Etxandi lantegiko langileen egoera CGTko ordezkariaren aldetik, eta langileen arteko elkartasuna aipagai izan ziren ELBK ordezkariaren hitzetan. Gisa berean, berrikitan auzitan langile bati aholkua emateagatik kondenatu duten Louis Labadot komunista-arendako sustengu adierazpenak izan zituzten ordezkari denek. X

Alemanian, enpleguaren eta gizarte justiziaren alde

Miloi erdi lagunek parte hartu zuten atzo Alemaniako bazterretan sindikatuek deitu zituzten 500 manifestazioetan. Guztietan enplegua eta gizarte justizia aldarrikatu zituzten. Leipzig-en Maiatzaren Leheneko ekitaldien kariatara borroka gogorak izan ziren gazte ultraeskuindar eta Polizia eta ezkerreko taldeen artean.

Portugalen ere 35 lanorduko astearen eske

Euskal Herrian eta Espainian bezala Portugalen ere 35 orduko lanastearen aldarrikapena eta enplegua sortzeko eskaera izan dira nagusi maiatzaren lehenean. Jada herrialde hartan ohitura denez, sindikatu bakoitzak nork bere aldetik ospatu zuten atzo langileen nazioarteko-eguna.

Manifestazio jendetsuak Kuban

Kubako sindikatu bakarrak, Langileen Zentralak (CTC) deituta, manifestazio jendetsuak egin ziren atzo Kuba osoan, guztiak ere «izaera iraultzailea berresteko». Festa handiena Habanan egin zen. Miloi bat lagun inguru bildu ziren Iraultzaren plazan, handik Kubako hiriburuko kale nagusiak zeharkatzeko gero.

Langabezia gora Txinan

Txinako industria sektorean langabezia gero eta handiagoa da -11 milioi behargin inguru daude lanik gabe- Maiatzaren leheneko ekitaldietan, ordea, Pekingo gobernuak arazo horri garrantzia kendu zion eta erreforma ekonomikoen aldeko mezua zabaldu nahi izan zuen.

Kanputxean zortzi orduko laneguna eskatu zuten atzo

Euskal Herrian eta inguruko herrian 35 orduko lanastea eskatzen ari garen bitartean, Kanputxean zortzi orduko laneguna ari dira eskatzen oraindik; zortzi orduko laneguna eta astean egun batez deskantsua egiten utz diezaieten. Phnom Penh hiriburuan 3.000 lagun inguruk bildu ziren atzo eskubide funtsezko horiek eskatzeko. Kanputxean langile gehienek 12 orduko lanegunak egin behar izaten dituzte.

SESB ohiko herrietan nostalgiaz gogoratu zuten Langileen Eguna

Sobiet Batasuna indarrean zela, agintari komunistek bultzatuta egiten ziren manifestazio bateratu eta jendetsuak desagertuak dira SESB ohiko errepubliketan. Moskun, esaterako, lau manifestazio desberdin egin zituzten atzo, errejimen komunistaren aldeko sindikatu diferenteek deituta. Baina manifestazioan parte hartu zutenak baino askoz gehiago izan ziren oporretara kanpora joatea erabaki zutenak. Herrialde baltikoetan, berriz, langileen eguna ospatu ere ez zuten egin, independentzia lortu zutenetik laneguna baita maiatzaren lehena.



ALEXANDER NEMENOV / EPA